



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma : f Tir Yimiyim

Instagram tiryimiyim@aolima

YouTube tir yimiyim

TAPAK 10

Hari Babu-i Mizoram Governor
inyaktsü tezüngzüktep agiogo

Shikhar Dhawan-i otsü
tasen ka yangluogo



VOL. XVIII NO. 276 (ADOK 276) DIMAPUR SANGTENNÜ (TUESDAY) CHITENI (JULY) 20, 2021 ₹ 5.00

NPF telok PDA government nung adentsü, Nagaland Assembly nung opposition malitsü

Kohima, Jul 19 (TYO): Nagaland yimten nung meimlaika, tanü opposition telok Naga People's Front (NPF), tang yimsü tesüdak NDPP teloki aniba People's Democratic Alliance (PDA) government nung adentsü telemtetba agiogo. Iba tatalokba yagi, joko, tang nungibo Nagaland Legislative Assembly nung opposition telok mali kumogo.

NPF lenir aser taoba Chief minister Wb. T R Zeliang-i anir mulungua dang PDA government nung adentsü renemogo aser Mongolbar nü Chief Minister Neiphiu Rio ajurua tezüluba nung agütsütsü ta NPF Legislature Party tenüng nung o jembir Wb.Imkong L. Imcheni iba osang bener den jembidang metetdaksü

NPF telok PDA government nung adentsü telemtetba ya Hombar nü Dimapur nung Wb.T.R.Zeliang'er kidang senden ka mena lemtet ta paisa ashi.

Ajisüaka, NPF tatartem ya NPF telok nungsa alitsü asü mesüra PDA nung aliba yimten telok ana -NDPP nung adentsü asü mesüra BJP akümtsüar, ajibo mejangjateter. Item ajakji Mongolbar nü NPF tatartemi tezüluba nung Chief minister nem

agütsü dang metettsü.

NPF tatartem Nagaland PDA government nung adentsü telemtetba agiba ya, tanga masü, saka kenbang obang ka ser Naga yimten tebilemetsü ya tekaratiba nung latettsü teimla aser tangatetba nung agiogo ta Wb.Imkong L Imchenisa ashi.

Kasa ya 2015 küm-a Congress MLA 8 NPF telok nung adenba agi tatar senden nung opposition mali aküm. Iba jakdanga Congress teloki yimsü asüdanga Nagaland assemblynung opposition mali asü.

Naga yimten tebilemetsü ken o tatembang kuma latettsü asoshi India government-i NSCN(IM) aser tanga tanünga Naga yimten telok NNPGs den jembia arudagi. Parnok ajak den yimten ken o tejembitsü tashibo 2019 küm October ita nung jembioaga ta metetdaksa lir saka tang tashi telemtetba magiteti lir.

Tang tashi nung NNPGs telok denbo ken o tembanga jembiba angazüker saka NSCN-IM den Naga nung temzüng aser wako dak sendakba onük nung ken o kar metembangteti lir. Ano talisa, Covid-19 wara aliba yagi ken o tembanga jembitsü mekoki kumadoker anena lir.

NCSU-i Table Tenders inyakyim anentsü nenshir

Dimapur, July 19, 2021 (TYO): Nagaland Contractors & Suppliers Union (NCSU)-i state sorkar department tem dang Table Tenders inyakyim anentsü nenshia metetdaksüogo.

Nagaland nung department temi contract mapa atema Table Tenders inyakyim malitsü atema aiben shiogo ta NCSU-i tanü sangdong ka nung metetdaksü.

"Lateta aliba ama civil maparen ajak open tender ajanga inyaktsüla. Ajisüaka, NCSU-i aiben mepishiaka department teimba kati sorkar

tetuyuba alema inyaker aser open tender melii mashi mapa lezmütsür" ta NCSU president Pele Khezheie aser General Secretary John Kath nati sangdong ka nung ashi.

"Department ajaki table tender inyakyim meinyaktsüla aser table tender ajanga work orders agüja aliba ajak agiener open tender sangdongtsü metetdaksür. Mekümdangra, NCSU-i aibelenba department tem anema PIL benoka okadak ajanga temeten bushitsüsa akümtsü" ta NCSU-isa metetdaksüogo.

AHoDs aser HoDs senden amen

Dimapur, July 19, 2021 (TYO): July 19, 2021 nü Secretariat Conference Hall nung Administrative Heads of Departments/Heads (AHoDs/HoDs) senden ka menogo.

Iba senden nung Directorate o Secretariat aser district tem nung Heads of Offices aser staff mapai maruba indang onük benoka lemsatet.

Department balalai Directorate of Health & Family Welfare dang mepishiba ama Special Vaccination Camp alitsü atema tanü senden nungsa telemtetba agi.


Senden nungsa Nagaland Rules of Executive Business 2020 benoka

lemsatet aser AHoDs/HoDs dang iba ya jungjunga metettsü ashi.

Nagaland nung department aikati Legal Advisors/Legal Consultants shima lir aser iba atema Department of Justice & Law-i anogo 15 tsünga osang bushia metetdaksütsü mapang lezmütsü.

Senden nungsa department website tem mapang shia update masüba tebilemetsü lemsatet. Iba onük atema Nagaland Chief Secretary, J. Alam, IAS-i department website mapang shia update asütsü aser Nodal Officer temi August 2, 2021 matongdang ketdangshia repringtsü atema tetuyuba agütsü.

HSLC 2020 nung tematiba 50 nem CMMSF agütsü



Chief Minister's Meritorious Students' Fellowship (CMMSF) sentong online ajanga agiba noksa nung angur.

Dimapur, July 19, 2021 (TYO): High School Leaving Certificate 2020 nung tematiba jenjang nung takok angur nem Chief Minister's Meritorious Students' Fellowship (CMMSF) agütsüogo.

July 19, 2021 nü online ajanga agiba sentong nung sempettem agütsü.

"Nenoki takok tajung angubaji meranga inyakba aser alizüng ayuba ajanga lir. Maneni tarutsü anogotem nunga nenoki state nem konang-nüngsang bentsür arutsü imlar" ta Chief Minister, Neiphiu Rio-i ashi.

"COVID-19 wara ajanga tetsükdaksütem ajuruaka, yaküm NBSE tatidang indang result nung pass percentage tajungba akümba nguogo. Kaketshirtemi maneni bendanga agütsüsüla, alizüng ayutsüla aser wara ajanga tayongzükba ajurubatem ajak

kokteta azüngtsü ayongzük" ta Rio-i metetdaksü.

"Kaketshirtemi state sorkar mapa inyaktsü atema dang mebilemetsüla. Naga lanur kari dang IAS aser Central Services mapatem angur anungji tekolok techiratemibo Union Public Service Commission kübok tatidang balala agütsütsü asoshi renemtsüla" ta paisa ayongzük.

"Alima kanga ainer aser talisa science & technology nung kanga renloka aoer. Anungji Education department-ia education system tajungba kümdakja kaketshirtem anitettsüla. Nagaland sorkari sorkar school 35 aser nija school 3 nung secondary & higher secondary levels nung skill/vocational subjects sayaogo" ta Rio-isa ashi.

Sentong nung School

Education Advisor, K. T. Sukhalua takok angur nem tenüngsang agütsü aser kaketshir ajak atema milen amertem asütsü ayongzük.

Sentong nungsa NBSE Chairman, Asano Sekhose-i CMMSF aser iba sempet atema eligibility criteria indang osang metetdaksü.

HSLC examination nung tematiba kaketshir 50 nem NBSE-i fellowship agütsür. Iba fellowship ya Nagaland nung Indigenous Scheduled Tribes nungi kaketshirtem asoshi lir aser küm 5 atema agütsür.

Tanü agiba sentong nung sempet angurtem- Model Higher Secondary School nungi Azizi Phesao aser St. John Higher Secondary Residential School, Dimapur nungi Ngamjong Jn Yanlem natia ojembi.

COVID-19 Nagaland: 62 dak putet, 61 taneptsü angu, 2 asü

Kohima, July 19, 2021 (TYO): Hombarnü Nagaland nung nisung 62 dak COVID-19 aliba puteta nisung ajak agi 26,744 kumogo aser külen COVID-19 puteta alir nisung 2 asüba züngsema tasür ajak agi 530 kumogo.

"Tanü nisung 62 dak COVID-19 putet. Parnokji Kohima nung 22, Longleng nung 17, Dimapur nung 9, Mokokchung nung 6, Mon o Tuensang nung asemsem (3) aser Wokha nung 2 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Hombarnü COVID-19 puteta alir nisung 61 taneptsü angu. Parnokji Dimapur nung 21, Kohima nung 12, Wokha nung 7, Mokokchung o Tuensang nung

trokrok (6), Longleng nung 4, Mon nung 3 aser Peren nung 2 lir. Parnok züngsema taneptsü angur ajak agi 24,321 kumogo" ta paisa ashi.

Nagaland nung COVID-19 nungi taneptsü angurji 90.94% lir aser tang nisung 1,147 anepaludar, ta Dr Kikon-isa ashi.

"Hombarnü Kohima aser Dimapur nung COVID-19 puteta alir nisung kaka asü aser tena züngsema tasür ajak agi 530 kumogo, saka nisung 14 bo tanga tashidak ajanga asü" ta paisa metetdaksü.

"Nagaland nung COVID-19 alitsü akok ta temolung melemi bilemba sample 2,47,348 tendangogo. RT-PCR ajanga 1,00,802, TrueNat ajanga 65,254 aser Rapid Antigen Test ajanga

sample 81,292 tendang" ta Dr Kikon-isa ashi.

"Deobar tashi nung nisung 5,55,145 nem COVID-19 vaccine indang dose 6,72,990 agütsüogo" ta State Immunization Officer, Dr Ritu Thurr-isa ashi.

Vaccine agirtemji frontline workers 60,488, healthcare workers 15,884, arishi küm 45 ser temapur 1,72,639 aser arishi küm 18 nungi 44 tsünga alir 3,06,134 lir, ta pai ashi.

"Vaccine agirtem rongnung nisung 1,17,845-i dose anaprong agiogo. Parnokji frontline workers 34,943, healthcare workers 11,626, arishi küm 45 ser temapur 71,116 aser arishi küm 18 nungi 44 tsünga alir 160 lir" ta Dr Thurr-isa metetdaksü.

Tanur atema Covaxin vaccine dose tanabuba tendanger

New Delhi, July 19, 2021 (Agencies): India nung tanurtem atema yangluba Covid-19 vaccine-Covaxin indang dose tanabuba taruba hopta agütsütsü.

Tanurtem atema Covid-19 vaccine ya tang tendangba mapang lir aser

All India Institute of Medical Sciences (AIIMS), New Delhi nungbo arishi küm 6 nungi 12 tsünga aliba tanurtem nem dose tanabuba agütsüogo ta osang angaziiker.

Indian pharmaceutical company Zydus Cadila-ia tanur atema

yangluba vaccine tendangdar.

Covaxin vaccine tendangba nung shilem agiba tanurtem nem dose tanabuba agütsüba sülen August ita tatemlen tashi nung interim report ka angutsü aser iba ajanga lendong ali-mali metettsü.

Nashi aser ak medemdangtsü makok: Assam Minister

Dhubri, July 19, 2021 (Agencies): "Nashi aser ak medemdangtsü makok kechiyong nisungtemi nashi mamatzü ajemer saka ak mamatzübo majemer" ta Assam Minister Ranjeet Kumar Dass-i Deobarnü ashi.


Assam Congress MLA Abdul Khaleque-i mosque meketa metre 500

telongtet nung ak metepsettsü aser ak shi mayoktsü ashiba atema Dass-i tanü iba o meyiptsü. "Hindu nung mesüra Muslim nung shingia ak mamatzü majemer. Ajisüaka, Hindu, Muslim mesüra Christian süang, nisung ajaki nashi mamatzü ajemer. Tanü asenoki nashi kümzüka ayutsüla


aser iba ya India nung shia indang tebilemetsü khuret lir" ta Dass-i ashi.

"Assam nung nashi mamatzü aser mamatzü agi yangluba chiyungtsü dak sendakba maparen tajungba kümdaksütsü atema Cow Protection bill benokogo" ta paisa shisem.

Covid putetaka meshirangertem pei kidang takdang balaka nung mongdaksür, idangji -



Pei alidak aser ayipdak mopong aittsüsa kichiba (window & ventilation) lapoka yuang.
 Akok tashi süngjanglijang aser süngolemba agi tua chiyongtsü tajung chiang aser tzü aser juice jemang.
 Pei meyong mobile phone, kumesü aser toothbrush nung ama melentepa tamshi.
 Mozü achitsü agüja lira, aji shitak chiang.
 Tango junga mesashitetba, teku ashiba, aketba aser temang metaba timtem lira yakta doctor bushiang.



Kohima DTF-i COVID-19 dak sendakba sentong ka ayongzüka agi



CMO Kohima, Dr. Vezokholu Theyo-i July 19 nü Kohima Village Council Hall nung sentepa alirtem den o jembiba mapang tangokba noksa nung angur.

Dimapur, Chiteni/July 19 (TYO): COVID-19, Kohima District Task Force (DTF)-i July 19 nü Kohima Village Council Hall nung Kohima, Chedema, Chedema Model, Tsabazou, Kijümetouma, Kijümetou Basa, Rüsoma aser Dihoma yimtsüngtem atema COVID tashidak tendangba aser vaccine agiba dak sendakba nung tangazükba agütsüsü atema sentong ka ayongzüka katsüogo.

Sentong nung o jembiba mapang minister in-charge, Tongpang Ozukum Minister for PWD (Mechanical & Housing)-i wara den raraba mapang sorkar aser district administration den teka amteper inyaksü atema North Angami Public Organisation (NAPO)-i telemteba agiba atema parnok dang kanga pelaba lemsatop.

State nung COVID-19 tensa indang metetdaksüba mapang Ozukum-i, Northeast nung tanga state tem den medemdangra, tashidak tendangba aser vaccine agiba dak sendakba nung Nagaland ya tekübokba jenjang nung tanabuba lir saka tasüba rate bo timba lir, ta ashi. Paisa, monor mozüki bushiba aser kidang temang anepaluba ajanga tashidak agi nisung aika asür ta shia, pai yimdaklirtem dang memeimshi tashidak tendangtsü aser tema anepalutsü ayongzüka, ajita asünungdang tashidak tali menatepyonga mao tsüngda nokdangtetsü, ta ashi. "Asenok kümzüka lira asenoki aser kibong aser lokti kümzüktetsü. Vaccine dak sendakba nung olulu osang prokshiba dak tamang makatsüla aser sorkari teyuba ama SOP sülen mapa ajak nung tashi angaa anidaksü nüngdaker," ta pai ashi.

Minister-isa, Kohima district kübok lokti tentetem teyari nung district administration, tasembuba wave atema tajungba renemer alitsü imlaba lemsatop, kechiyong sorkar kijai wara den raratsü tamakoktsü. "Kohima-i tatishitsü sayutsü mapang lir. Shishirtem sentepa aliba tesem aser Naga nung rongnung tejakleni orr aliba district ka ama asenoki vaccine agiba nung süang, sorkari COVID-19 dak sendakba nung tetuyuba agütsür aliba sülen tashi angaa anidakba nung süang, item ajak nung tangar dang lenmang sayautsüla," ta pai ashi.

Sentong nungsa Urban Development and Municipal Affairs Advisor, Dr. Neikiesalie Nicky Kire-i o jembiba mapang, sentepa alirtem dang covid dak sendakba yimayimpongtem shisaa kaa anidaksü kodang tongtibang iba indang lemsatopba den mask asemstüba, merekmejua alitsü aser lokti nung tetsüngda ita inyaksangshitsü nenshia metetdaksü. Paisa, tekaratiba nung temang anepalutsü aser nüburtem kümzüka toktsütsü atema tashidak menaba meimshia malitsü ajungshi. Dr. Nicky-isa, khuret angatetba senso tajung ka ama wara nung lokti kümzüka toktsütsü atema vaccine agitsü aser tashidak mapang shidak nung tendangtsü ayongzüka.

Kasa mapang nung Technical Education & Election, Advisor Medo Yhokha-i, yimtsüng lenirtem aser lokti tentetem dang tarutsü nung pei lokti kümzüka ayutsü atema covid inyakyim benoka inyakba nung teka amteper inyaksü mepeshia metetdaksü.

DC & Chairman DTF

Kohima, Gregory Thejawelie, NCS-ia, lokti aser tarutsü putu kümzüka toktsütsü atema nisung ajaki pei shilem agitsü ayongzüka den Epidemic Disease Act 1897 aser IPC Section 188 dak rangloker jembia. Item temzüng ozüng dak ajemdaker sorkar tetuyuba sülen manidakertem nem tapet temerenshitsü agütsüsü akok, ta pai ashi.

Maneni CMO Kohima, Dr. Vezokholu Theyo-i, July 18 nü tashi nung Kohima district nung nisung 1,79,486 nem vaccine agütsüogo, aser item nisungtem rongnung 1,05,706 mezüngbuba aser tanabuba dose agiogo aser nisung 88532 mezüngbuba dose agiogo ta metetdaksü.

CMO-isa, covid dak sendakba yimayimpong shidak bentshitsü, mapang shidak nung tashidak tendangtsü aser tashidak menar alir mesenmetui amshiba nungi pilaa alitsü aser mapang shidak nung vaccine agitsü ajungshi..

Sentong nungsa Northern Angami Public Organisation tir Zeneituo Yano-i, iba tesem nung aliba nüburtem atema sentong tajung ayongzüka katsüba atema Kohima DTF dang kanga pelaba lemsatop. Paisa, iba sentong agiba ajanga nüburtem arendaka aliba aser ken o mejangjai alibatem jangjashitsütsü imlaba lemsatop, aser tarutsü nunga NAPO-i DTF nem takokba tashi teyari agütsüsü nangzüka.

Iba sentong ya SDO (C) Sadar Kohima, R. Daniel Angami NCS lenisüba nung agi aser paisa tepela anküp o jembia liasü. NAPO, NASU, NAYO, NAWO, AYO aser yimtsüng balala nungi Village Council, Village Task Force, tetsür lokti tentet nungi züngsem asemsemi iba sentong nung shilem agia liasü.



Mokokchung district kübok July ita atema Beneficiaries tem PMGKAY janga agizükba noksa nung angur. Jang ya Food & Civil Supplies Mokokchung office nungi agizüka liasü. PMGKAY IV ya Department of Food & Civil supplies Nagaland-i, 2021 küm July ita nungi November ita tashi benoktsü. PHH aser AAY scheme kübok aliba beneficiaries tem ita shi nisung shia jang seret 5 angati angutsü.

NBSE-i webinar ka ayongzüka agitsü

Dimapur, Chiteni/July 19 (TYO): Nagaland Board of School Education-i, Madhubun Educational Books den longjemer ayongzüka webinar nung shilem agitsü atema tesayurtem jaokogo. Iba sentong ya "Emotional and Psychological well-being of Students" omen nung ajemdaker July 30 nü nikongtsütsü 3:00 ako nungi 4:00 ako tashi agitsü.

Tangazükdak aser renloka aodak tesem ka ama school tem ya kaketshirtem emotional aser psychological health nongita yaritsü atema aser yanglushitsü

atema kanga tapet. Nüngtugu educationist, psychologist aser well-being coach Ruma Purkayastha-i iba sentong nung shisatsü balala agütsüsü.

Webinar atema meeting ID aser passcode:

Zoom meeting: <https://us02web.zoom.us/j/86234863975>

Meeting ID: 862 3486 3975

Passcode: 562746

Institutions tekolaktem dang iba webinar nung shilem agitsü atema tesayurtem ajungmesotsü mepeshia metetdaksüogo.

ATMA Kohima-i training sentong ka ayongzüka katsü

Dimapur, Chiteni/July 19 (TYO): ATMA, Kohima-i achayanga July 16 nü Nagaland State Dairy Farm Kohima nung Dairy farm management & practices dak sendakba nung capacity building training sentong ka ayongzüka katsüogo. Iba sentong nung Farm manager, SCBF, Lerie, Dr. Ketholelie Mere shisalen agütsür liasü.

Iba sentong ya technical session ka agia tenzüka, kong shisalen agütsür dairy farm complex aser dairy farm inyakyim indang shisatsü agütsü. Maintenance of identification, bedding, & exercising, dehorning, castration, grooming, weighing, deworming aser deticking amala inyakyimtem indang pai metetdaksü. Item inyakyimtem ya dairy farm nung tetishi benoka inyaker aser iba ajanga dairy farm tem renloka aoba nung teyari agütsür. Mamatzü agütsüba shirurtem jangjatsü kanga tongtibang, kechiyong iba ajanga taoba mapang inyakyimtem tali jangjaa metetdaksü, ta pai ashi.

Maneni branding, tagging, photography, electronic tags amala identification inyakyim balala pai sayua liasü. Anogoshia exercise agiba ajanga shiruru

teyiraba aser tali yakyaka kümduksür. Iba ajanga metabolic process azüoka ayuba nung teyari agütsür. Tsüngküm mongpu ajak nung anisüngzüka asoshi shiruru nem bedding material tem agütsüsüla aser tagidak maka tezütem mapang shia intoktsütsü kanga tongtibang. Castration ya küm 1 sülen inyaker. Grooming amala inyakyim ajanga kou, tekep intokba nung teyari agütsü aser iba ajanga shiruru anisüngzüka toktsür. Chiyongtsü achiba aser mozü dosage jangjatsü atema shiruru temang tozüka odangtsü kanga tongtibang. Deworming ya tepok nung mesen aliba intoktsü atema lir aser deticking ya shiruru temang nungi atsük intoktsü atema lir, ta pai ashi.

Technical session tembangba sülen sensaksem sentong ka ayongzüka agia liasü. Iba sülen training nung shilem agirtem dang Pedenuo Shuya, Wonchibeni Ezung, Lejao Konyak aser Khrietseimenuo Chadi nungeri maparen kar inyaka sayu.

Training sentong nung Kohima district kübok progressive farmer 30 aser ATMA staff temi shilem agia liasü. Iba sentong ya Dy.PD ATMA Kohima, Rokoshuno Angela lenisüba nung agi.

Noklak district kübok yimtsüng 11 nung Poultry Farms amenok

Kohima, Chiteni/July 19 (TYO): Noklak Police aser ICAR na senteper Noklak district kübok yimtsüng 11 nung poultry farms amenokogo. District nung aliba lanurtem tashi lenmang shidak nung amshitsü nükjidong nung "for self reliant Noklak" omen nung ajemdaker iba mapa tenzüko.

Noklak Police sangdong ka ajanga, ICAR-i anchanu 2000 agütsü aser anchanutem ya Self help groups (SHG) 12 nem lemtsüogo, ta ashi. Noklak police aser Noklak nung amenoka aliba NGO temi iba sentong takok asoshi ICAR den angatettepa inyaka aruogo, aser kasa mapang nung TRPO tir Hangthing aser KMH tir Newkai nati anchanu lemshiba aser belenshiperaba nung teyari agütsü liasü, ta kasa sangdong ajanga metetdaksü.

SP Noklak, Dr. Pritpal kaur IPS-i, lanurtem ya linük asoshi tarutsü nükla lir aser mapa balala inyaksü asoshi maangka aika meliaka, taküm libaliro jenjang tajungba küm yanglutsü atema peisasa inyakteta liyonga aotsüji lenmang tajung ka lir ta ashi.

Dr Kaur-isa, entrepreneurship atema SHGs tenzüka lanurtem aika nem poultry farm lapoktsü asoshi anchanu agütsüogo ta ashiba

den, lanurtem iba mapa inyaksü asoshi tejangraba aliba reprangtetogo, ta ashi.

Laisa, lanurtem tashi ya lenmang sayua mapang shidak nung mamshira, district nung temesepba mozü achiba aser tanga yimayimpong tamajungtem bentshiba tebilemstü aliba ajanga lanurtem aser lokti dak kanga kara kongshitsü. Anungji tetenzük nung lenmang shidak sayuba ajanga nisung ka pei mapa nung tetangshi kümduksütsü aser iba ajanga lokti renloktsü. Maneni iba ajanga Noklak ya tangar dak memetaloki aliba district ka kümduksütsü, ta ashi.

Kasa mapang nung Noklak Police aser KVK Tuensang na senteper Noklak nung aluyimertem nem basmati jang metsü agütsüogo.

SP-isa, Nagaland nung taküm tesem aika nung tsüngsarosa ulura lir, ta shi aluyimertem dang tzü bendena ayutsü aser tzü kanga kümduka amshitsü ajungshi. Maneni lai, COVID-19 wara ajanga state mokdang ayuba agi metsüjangnatsü lemtsütsü asoshi menoadok, anungji aluyimertem dang metsü tekaratiba nung mekoa atemtsü asoshi sayuogo, koba hopta ana shi dang agitsü, ta ashi.

Hari Babu-i Mizoram Governor inyaksü tezüngzüktep agiogo



Dr Kambhampati Hari Babu-i Hombarnü Mizoram Governor inyaksü atema tezüngzüktep agiba noksa nung angur.

Aizawl, July 19, 2021 (Agencies): BJP lennir tejen aser taoba Andhra Pradesh Lok Sabha MP Dr Kambhampati Hari Babu-i Hombarnü Mizoram Governor inyaksü atema tezüngzüktep agiogo.

Pa ya Mizoram nung Governor 22 buba lir.

Hari Babu-i PS Sreedharan Pillai nungi mapa melenzükogo. Pillai ya Goa nung Governor inyaksü atema lemzüksü.

Tanü Raj Bhavan, Aizawl nung Gauhati High Court judge, Justice Michael Zothankhuma-i Hari Babu nem tezüngzüktep agidaksü.

Coronavirus ajanga total

lockdown aliba ajanga iba sentong nung nisung kar dang aden. Parnok rongnung Chief Minister Zoramthanga aser par cabinet züngsemtem, state Chief Secretary, Director General of Police (DGP) aser political party o NGOs lennir kar aden.

Hari Babu ya 1953 küm Andhra Pradesh kübok Thimmasamudram nung aso. Pai Andhra University nungi Electronics & Communication nung B Tech azüing aser kasa university nungisa electrical & control systems nung master degree aser doctorate degree tem angu.

Küm 24 tashi University indang Engineering College nung Associate Professor ka ama inyaka aruba sülen pai 1993 nung politics nung tetsüing ajemok.

1999 küm Visakhapatnam-I menden nungi pai Andhra Pradesh Legislative Assembly nung züngsem ka aküm.

Iba sülen 2014 nung pa Andhra Pradesh State BJP president aküm aser 2014 nungsa Vishakhapatnam nungi 16 buba Lok Sabha nung MP aküm.

Mizoram nung Governor inyaksü meshim dang Hari Babu ya BJP indang National Executive Member (2018-2021) liasü.

Supreme Court-i Manipur activist Erendro chioktsü tuyur

Imphal, July 19, 2021 (Agencies): Supreme Court-i Manipur nung amenoka aliba political activist Leichombam Erendro chioktsü atema tetuyuba agütsüogo.

Taküm May nung Erendro ya National Security Act (NSA) kübok tai tonglokja apu.

Taoba Manipur BJP president S Tikendra Singh COVID-19 ajanga asüba atema Facebook post ka asüba nung ajemdaker pa apu.

"Hombar nikong dang 5:00 ako matong dang pa chiokang" ta Justice DY Chandrachud aser Justice MR Shah na adenba Supreme Court bench-i tetuyuba agütsü.

Leichombam Erendro tebu

L Raghurani Singh-i Supreme Court nung petition ka benoka liasü.

Par jabaso nem bail temelaba magütsütsü atema NSA benok, ta pai SC dang ashi.

"Corona atema taneptsüji nashi scü aser nashi natzü masü. Taneptsüji science & common sense lir, Professor" ta Leichombam Erendro-i Facebook nung zülü.

Iba atema BJP lennir Usham Deben Singh-i Erendro anema FIR benok.

Ajisüaka, Erendro apuba sülen anogo pezü lir local court kati pa nem bail temelaba agüja liasü saka Imphal West District Magistrate-i NSA

kübok Erendro tanaben aputsü tetuyuba agütsü.

Erendro tepuokdak ayuba ya Constitution indang Arrla 21 nung pa nem temeten agütsüba alema lir, ta Supreme Court bench-i ashi.

"BJP yimsüsür aikati nashi natzü aser nashi scü ajanga COVID-19 noktanger/anepalur ta osang tai prokba nung ajemdaker Manipur BJP President COVID-19 ajanga asüba indang olenji zülü" ta Erendro tebu isa SC dang ashi.

Manipur jail ketdangsürtemi Hombar nikong dang 5:00 ako matong dangsa pa chioktsü tetuyuba agütsür, ta SC-i metetdaksü.

Shillong nung 5-star hotel yanglutsü atema sorkari tenangzüktep agitsü

Shillong, July 19, 2021 (Agencies): Shillong nung 5-star hotel ka yangluba maparen tembanga inyaksü atema Meghalaya cabinet-i Maxim Infrastructure and Real Estate Pvt Ltd den küm 30 indang lease agreement agitsü telemtetba agiogo.

Taoba mapang Meghalaya sorkari 5-star hotel yanglutsü atema HM Cements den tenangzüktep agia liasü.

Ajisüaka, iba mapa küm aika anendaka lir aser company sorkar nem Rs 2.5 crores agütsütsüba lir.

Cabinet senden amenba sülen Meghalaya chief minister Conrad Sangma-i ashiba agi "state cabinet-i küm 30 indang

tenangzüktep agitsü aser iba mapatong tembanga inyaksü atema telemtetba agiogo" ta ashi.

Taoba company-i sorkar nem sen agütsütsü aliba meyiptsütsü aser company tasenbai tenangzüktep nung sign asütsü, ta Conrad-isa metetdaksü.

Company tasenisa Shillong Municipal Board (SMB) indang office ka yanglutsü, ta paisa ashi.

"Onoki iba mapatong tembanga inyknür kechiyong iba ajanga nübortem aser tourism sector ajangzüksü" ta Meghalaya chief minister Conrad Sangma-isa metetdaksü.

Karbi Anglong nung heroin aika apu

Bokajan, July 19, 2021 (Agencies): Deobarnü East Karbi Anglong nung police-i heroin aika apu.

Dillai Tiniali tesem nung Dillai police-i Maruti Swift gari ka soter mita rebrang dang sapon case 10 nung heroin gram 120 enoker bena aliba angu.

Mozüji gari tesülen menden telunglen melepoka liasü, ta police-i ashi.

Honibarnü Karbi Anglong police-i Diphu nung ozüingi memelaba mozütem raksaa endokba sentong ka nung Chief

Minister Himanta Biswa Sharma-i shilem agiba sülen anogo ka lir heroin apu.

Police-i Karbi Anglong district nung Rs 163 crore alang mozütem puogo.

Iba dak sendakba nung Ikramul Hussain ta ser nisung ka apu. Pa ya Morigaon district kübok Moirabari nung lir.

Hussain-i Nagaland kübok

Dimapur nung heroin ji ali aser Moirabari nung oa ayoktsü atema bener aodang apu. Police-i iba ken o atema maneni bushising dang südar.

Office of the
AO SENDEN LITERATURE BOARD (ASLB)
MOKOKCHUNG - 798601
NAGALAND. Reg. No. HOME / SRC-6703
Ref. No. ASLB/AT-03/2020-2021 **Anogo: 18-07-2021**

LB ACADEMIC COUNCIL ASER ASLB OFFICE
AJANGA NÜNGDAK KAR YAMAI SANGDONGER

Taküma alima ajanga COVID-19 wara mopung majungba ajanga Arangtet Tatidang küm nung anaben agitsü sentong liaka maparen agi anabenji magitetsüsa aküm nung 2021 küm atema Mezüngbuba Arangtet Tatidang agitsü anogo aser mapang ASLB-Academic Council-i memenui jelia osang agütsütsü. Anungji tekübok agüja aliba nungdaktem rebranga tatidang agütsünür ajaki inyaksü mepishir.

- 2021 Arangtet Tatidang atema Shiyim (Form) agizüktsü atema Luroi 20, 2021 tashi mapang apuloktsür, anungji tatidang agütsünür ajaki Mokokchung, Kohima, aser Dimapur nung tekübok agüja aliba Mobile number-tem nung tongteprateptsü mepishir.
- 2021 Arangtet Tatidang Tenyim (Syllabus) yanglushia kakat küma adoka lir, anungji tatidang agütsünür ajaki (Shiyim bener or alirtem dena) iba Tenyim atema office den tongtepratepangma.
- Arangtet Tatidang 703 (PGDT-703) temer Dissertation zülutsü onük agütsür alirtem aser Aenjeti, 2021 tashi nung PGDT-703 paper ajak nung takok ngur alirtem Dissertation onük Chiteni, 2021 tatem tashi nung office den tongteprateptsü mepishir aser nisung kar Mobile number agüja aliba melenshir lira office den tekaratiba nung tongtepeatepang.
- Private School nung azüngertem Class 1-8 atema Ao Tazüngtsü Kakat talitsü peria angutsü, anungji Office mapang arua nungdakbapur ajaki alitsü mepishir.
- Class 11, 12 aser Arangtet Tatidang agütsütsüpur Akümlir Mungsong II (Revised Edition-2021, Temyim nung keta alirtem atema) adoka lir, anungji taoba küm aliba kakat lir ta bilema melii iba kakat 2021 Edition alia azüngtsü mepishir.
- Arangtet Tatidang 2021 Shiyim (Form) aser Nüngzülu (Admission) atema tekübok agüja aliba tesem aser Mobile number nung tongteprateptsü agütsür.
 - Mokokchung ASLB Office - 9089816427 & 9436436180
 - Kohima (Agri colony, near Assamese Church- 9856714829
 - Dimapur (East Dmp. Ao Baptist Church) - 7005501457

Sd/- **Sd/-**
Rev. Prof. Rongsen Longkumer **I. Temjen Tzüdir**
Convenor ASLB/AC **Secretary, ASLB**

GOVERNMENT OF NAGALAND
DIRECTORATE OF TOURISM
NAGALAND: KOHIMA
NOTIFICATION

Dated Kohima, the 17th July 2021

NO.TOUR (T & S)-3/2011-12 // Interested Candidates are invited for admission at Institute of Hotel Management, Guwahati and shillong for the following courses.

Sl.no	Course	Institute	Eligibility	Last date of submission on or before
1	B.SC in Hospitality and Hotel Administrative (3 years degree course)	IHM Guwahati and Shillong	10+ 2 or equivalent examination from CBSE, ISE & other state board examination	On or before 26 th July 2021
2	Short term course	Guwahati	Passed 10 th Class	On or before 10 th August 2021
a)	Craftsmanship course in Food production & Patisserie (1 ½ yr)		Graduate in any stream	
b)	Post graduate Diploma in Accommodation Operation & management (1 ½ yr)		Class 12 th Pass	
c)	Diploma in Housekeeping (1 ½ yr.)			

N.B

- For 3 Years Degree course applications supported by all necessary documents may be submitted in the Department's Email id: nagalandtourism2014@gmail.com
- For admission to short term course forms may be downloaded from www.ihmctanghy.org.in

(AJANUO BELHO)
Director of Tourism

Issued by DIPR



TIR YIMYIM YIMOBILEM (EDITORIAL)

DIMAPUR SANGTENNÜ, CHITENI (JULY) 20, 2021

Nagaland ya Nagaland dang tuluba

Naga nunger yimten nüchiso atema raraba ya India yimten kübok alena aliba nungi salatsüba dang masü saka Naga nunger lushi ajak yimten ka kübok bener arua linüba tejangraba lir. Iba tejangrabaji tim dang, kechiyong kibong ka dang nungi jakzükba kin ka ser kodaser kin balala kümer, yimten balala kübok alushi lemdanger, kinunger agi pi kümer alitsü? Ajisüaka, küm noklangka jakdang alima nung kin aika pei pei kin kümteta aodang, asenok Naga nungertem dak alima temetetba mali aser shisatsü nung main, ano asenok o asenok na ta junga memetetep ta asüba tia ka nung, asenoki asenok asoshi yimten jenjang ka alangtetsüba mekoki liasü ta tangang rajemer. Iba jagi Naga nungersa süaka asenoki asenoksasa tanüang yimten balala kübok alushi balala tsüngda arr ladanger aliba repringtetter. Aji oda, asenoki yimten ka kübok asenok kimong lumong ka ser külemi linüyonga, joko, tang tangbo melitetsüsa tensa tia ka nung asenok liadokogo. Ashi, shitakba Naga limabo tang asenok aliba Nagaland state ya dang masü saka tulubalen ka Myanmar nung lir aser India küboksa süaka Arunachal Pradesh, Assam aser Manipur nung Naga nunger aliba lushitemji nisungji dang masü saka alushijia Naga nunger lushi lir. Aji oda, tangsa Naga nunger lushi ajakji Naga yimten ka kübok meyetetaka, asenok Naga nunger shiai asenok koba lima mesüra koba state nung lidir liaka, asenok ya Naga nunger aser Naga nunger li nung alir ta angatetra aser iba tangatetbaji mamadoki senmang küma amanga otetra, ibaji Naga nunger ajak yimten ka kübok ser meputepi aliba dang nungibo noklangben agi tajungba asütsü. Iba tangatetba nung, tamakoktsü ka putusa putu merangdanga amongtsü agibo, khen anener, takok angutsübalen repringdang apusoshi nungbo, iba len jagiang yakta tadongtsü ka atongtsüsa anitsü. Joko, tanübo alima ka akümtsüba ya alushi temakazük tilaka ya masü saka alima ajunga ka dang kümogo, anungji asenok kong lidir liaka, asen mapa tajung agi asen alidak limaji asen lima küma alitsübjang tongtibang aser tenüngdakba lir. Iba tangatetba tsütsü kodang bilemdangdir, yashi July 19 anogo nung America lima New Mexico state ajaklen Khonoma (Angami) nunger Dr. Jonathan (Vilasier) Iralu anogo asütsü ta yimteni ayongzuka amongba mapa jagi US nung New Mexico state- jia Naga lima kümogo ta angateter. Iba kasaji alima tesem kongsa Naga nungertemi Dr. Iralui inyakba amaji alimai pelatsüsa aser metettsüsa inyaker, iba limaji Naga lima asütsü. Dr. Jonathan Iralu ya Khonoma nunger, tebuo-a aser tebuo medical doctor liasü, anungji pa yabo Doctor-ba'er jabaso dang masü saka Doctorba'er semchir. Pai New Mexico nung Covid wara tongpang nung nübortem dang meima bendanga agüja anepaluba mapa tajung ngua pelaba tamaitü New Mexico state yimteni pa tushia iba July 19 anogo ya mongogo. Pa denji kodang asenok Naga lima nung alir Naga nungertem mapa medemdangdir, anung o ali na tepila amato medemdangtetsü. Asenok asoshi asen nübortemi tushia anogomong mongtsüsbajibo yutsür, asenok ochimashi aser tashiyim mapatem agi nübortem mulung kanga kuremdakja lir, anungji asen nübortemi asen den külem ser yimten dang masü saka lokti tentet nunga külemi meliner. Tanü asenok Naga yimten onük nung Naga nunger alushi indang jembidang asenok tangatetba ulushia bilemstü, jembitsü aser inyaksü asoshi Dr. Jonathan Iralui asenok ajak nem tatishitsü tajung ka sayuogo. Aji oda, pa amaji Naga nunger senso tajung aika maparen tapu balala nung alima tesem ajaklen inyakdagi, item tesemtem ajakji Naga lima amato asenoki bilemdi, süra atangji nung Nagaland ya Nagaland dang nungi kanga agia tuluba asütsü. Asenok atemabo tang asenok aliba Nagaland state ya dang Naga lima amato bilemer, iba jagi asenoki Naga lima tulubalenka mangu aser memetet ser Nagaland tilaka nung ya ali raktepa amonger aser mapa tajung nung nungtugu akümtsü meranger masü saka mapa meinyaki takar akümba aser mapai mao ita sen achiba mapatem nung nungtugu akümtsü tokteper amai tokteper. Iba anogomongji shirnokibo mongtsütsü? Aji oda, New Mexico nung Dr. Jonathan Iralu anogomong amongba amaji, asen lima nung asenoka asen anogomong mongdi asünungbo, kechi ama anogo ka kechi atema amongtsü (?) ta bilemdanga, Naga lima yimten onük aser alushi indang tangatetba ulushitsü nungdaker.

OLEMSABANG

AROK AJUNGTSÜ BILEMBA

~ I.Meyionen Jamir

Meimchir alima nung libalirua tenzükba otsüji kodang repringdangtir, adianui adianu anema tenukmerema, pei ajung asaa tenzükba angur. Meimchir rongnung mezüng kibong Adam aser Eve na jabaso tambusang Cain i tenu Abel tepset. Isac er chir Esau o Yakob na senmang raktep aser ashikülak mapa inyak. Pei ajung asaba, pei ajungtsü bilemba, tangar ajung majinuba aser tenuk meremba, asen kin temaba, tuluba aser tangarjibo asen lar, asen dang nungi jenjang teküpok ta bilema aser libalirua alima kin balalai mapang aser tensa balala nung lia aru. Kar jenjang tajungba aser tanüngba tamajungba ta nisung rongnung bendangshidanga arur. Ano tetsür-tebur tsüngda nunga temeden jenjang balala nung lia arudar. Tanak aser temesung tsüngda nunga temeden balala lia alar jenjang nung arugo. Aji saka ano kanga dang temeteter America lima ama nung tanak aser temesung nisung tsüngda tebandang lir. Yaküm May 2020 nung Black American George Floyd, Minneapolis Police i tepsetba tatalokba agi tanak-temesung tsüngda bendangshidanga jenjang balala nung anosa libaliruba angur. Azü tajung, tera tajung aser tamajung tetsüngda lia nisung rongnung jenjang sakükü mesui lia arur.

Asen Aor otsü kodang repringdangtir, arok ajungtsü bilema Chungliyimti nung sumedem. Yimsusuba putu menden shitak lateter, tepong langer, jaya-jako tebetet, anikilen asüngteta telembutsü shitak lembua, anempongtsü tim nung anemponga asüngteta asen Ao kin sobalibaa tenzük. Saka kobi melie yim o yim na anemtepa tekolak bushia tsükchitep tenzük. Yimtsüng sungkümshi ka nung külem alir suaka kin tulu-tila, tamapur-tesupur, takar-sensaker, tashir-mashir tsüngda tebandang lia jenjang balala nung aruba otsü asenoki jembir.

Arok ajungtsü bilemba tangatetba ya tanü tasen masü. Küm merijang ana dak tali ogo, Greek nunger shisarajemer Plato aser Aristotle nungeri meimchir inyakyim, asalendong kechisarena nung lokti timba koba tashi ajangzük ta asüba tangatetba nung lokti ka jenjangji asadanga aru. Ano iba sulen England nunger nungtokü shisarajemer Jeremy Bentham ajanga meimchir timtiba kodaser tepela taküm alitsü iba tangatetba agütsüba angur. Sendong tajung ajanga lokti timba ajangzuka lira aji tim ta agizük, saka koba nung sendong majungba ajanga nübor majangzük iba yimsusubaji hau ta magizük. Tanü asen tendak election aruli oli ta küm pongu shia ajurur. Nübor asoshi koba govt i tajung meinyaker aser pei ajung dang asar iba telokji atsüngdoker tajungba telok shimtsü maongka angur aser nübor tangatetba dang lira arok ajungtsü meinyakba party ji reject asütsüla. Saka tia maka govt teinyaktetba/ tamakok masadangi sen yong mesuzükdaksüba/ayokba ajanga asen lima nung temelenshi marur aser nübor majangzük. Democratic country nung arok ajungtsü asoshi inyakba welfare schemes aieka lir. India nung sorkar mapa inyaker retire asür nem pension agütsüba ama, tazüngertem nem scholarship agütsüba, subsidy tapu balala agütsüba, aluyimer yariba aser ibala mesukba health sector nung, employment sector nung, sensaker tia tajungbai ajungketba nung programme noklang tema social & economic area tem nung lir.

Lokti kaji kodanga sorkar dak dang rangloker, metaloker, teyimlaba, takinuba ajak ataa tenung sena malir. Saka pei inyaktetba mapa nung sorkar i teyari terara agütsütsü akok saka noklang nung noklang govt i mataloktsür. Tanga society nungbo sorkar dang nungi company balalai timba mapa agütsür aser nübor nungdak rongsen rendaktsüba nung shilem akir. Tanü joko company aikati par tajangzük kisung mebushie arok ajangzükba mapatem inyaker. Lokti aser nübor asoshi parnok koba tesem nung company lapoka lir item nübor ajungtsü asoshi mapa tajung inyaker koba dang corporate social responsibility ta ajar. Tatishitsü agi: Ben & Jerry's Ice Cream company ajanga par tajangzük nungi 10% parnok alidak Vermont nung nübor nungdak balala asoshi temeim mapa inyaker; Body Shop skin care products yanglurtemi par tajangzük nungi ki talidak makartem asoshi teyari agütsür; Toms shoe yanglur company ajanga shoe jura kaka yokzükba nungi sensaker nem mapang apir shoe lema agütsür. India nung corporate social responsibility mapa nung sen endokba company tulu kar: Infosys Limited (IT company) covid relief mapatem, education & health care nung Rs 360 crores (2019-20) nung endok. Iba nung yipden 100 aliba Quarantine Centre, Bangalore nung yanglutsü; ano Mahindra & Mahindra Ltd i 2018-19 nung sensaker kibongtem nungi tetsür chanutem nem education agütsüba nung Rs.93.50 crores endok; maneni Tata Chemicals Ltd ajanga community development balala nung 2019-20 nung Rs.21.39 crores endok.

Alima linuk ajak nung sorkari kodaser nübor timba ajangzüktsü ta sendong balala yanglur yimsu asütsü meranger. Aji suaka nisunger pei asoshi ajangzük nudang lokti tuluba ajungtsü asoshi masü saka sorkar sendongtem pei tsütsü atsünga yangludaktsür. Tatishitsü agi, arms & ammunition aser sepai sobusolemtsü yanglur temi linuk kümzuka tsükchir nungi jenbuttsü tenung nung sorkar sen aika endokdaksür. Saka iba senji nübor temang anema alitsüba, shisatsü angutsüba aser tajemrepba tia nung alir asoshi amshitet nung koda jungla? Tang alima nung USA, China sulenbo defence budget India tasembuba jenjang nung lir. Tanü sorkar sen endokiyimji repringdangra arok ajungtsü asoshi inyakba maparen aikabo mangur saka koba mapa inyak nung ketdangsertem pei juli asüngtsü ibaji atsünga sendongtem yangluba angur. Nübortem madak yimsusertemi lokti timba ajangzüktsü asoshi masü saka pei ataba mapang pei kibong, pei kin dang repringer aser tanüngba kintem senzuka yutsür.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

'The Jesus Music' documentary nung Lauren Daigle, Amy Grant aser Kirk Franklin nungeri shilem agir



Lauren Daigle

Amy Grant

Kirk Franklin

Los Angeles, July 19, 2021 (Agencies): "The Jesus Music" ta ser documentary film ka nung kentenertemi kumtem süia arudang Christian music melenshiba indang rasa ashir. "The Jesus Music" ya October 1, 2021 nü sayatsü aser iba film nung tanü noktaka aliba Christian genre indang tera rateta ashitsü. Iba film nung nungtugu kentenertem- Amy Grant, Kirk Franklin, Michael W. Smith,

TobyMac aser Lauren Daigle nungertemia kulitem agüja lir. "Kenjang, kensü, aser ola ajanga nisung ka tanüla nung teimla agütsüba ya ni mangateter" ta Daigle-i documentary nung shia lir. "Osangtajung ken aika tenük shibanger Tsüngrem nem ken atenba lir, ni tenük lapoker kati ka den ken tennüa liasü" ta Grant-ia ashi. 1960s mapang civil mepetmesü tiyongtsü nung CCM genre adokba indang

documentary nungsa shia lir. Iba film ya Erwin Brothers-i direct asü. Parnokisa "I Can Only Imagine" direct süogo. Documentary nungsa Toby Mac-i kodanga mejembiba osangtem aser Chris Tomlin-i Tsüngrem aser music tsüngda tesentaktep indang shia lir. Maneni, DC Talk, John L. Cooper, for King and Country, CeCe Winans aser Steven Curtis Chapman nungertemia o jembia lir.

Chhattisgarh police-i Khristan Missionary tem atema tetuyuba agütsü

New Delhi, July 19, 2021 (Agencies): July 12 nü Chhattisgarh kübok Sukma district nung superintendent of police-i sangdong ka agütsüba ajanga Khristanem kanga aoksadaksüogo. Sukma nung SP taseni district nung police ketdangsürtem aser police station nung officers in charge ajak dang Khristan missionary tem inyaksangshi nung tenük yoktsü tetuyuba agütsü. Hindi nung züluba sangdong nung "District nung Khristan missionary tem den Khristan yimsü agizükba lisopurtemi yimtsüngtemi oa Khristan akümtsü atema lisopurtem mesüzüker" ta shia lir. Police ketdangsürtemi iba onük süoki ia bilemtsüla aser osang metetpelatsüla, ta Sukma

SP-isa metetdaksü. November 1, 2000 nü Chhattisgarh nung Bharatiya Janata Party (BJP) sorkar akümba sülen küm 15 atongtepa yimsü süa arudang tamangba yimsü tsütsü mepetmesü adoktsüsa ashishitep aketba ozüngtem yangluogo. 2006 küm Chhattisgarh assembly nung Raman Singh'er sorkari ashishitep aketba Dharma Swatantraya Adhinyam Act agizük. Madhya Pradesh nungi Chhattisgarh state balaka kumtetba sülen Madhya Pradesh indang anti-conversion law benok aser ibaji 'Chhattisgarh Freedom of Religion Act, 1968' ta aja. Tawa tetuyuba agütsüsang Sukma SP, Sunil Sharma-ibo pai sangdong agütsüba aibelena

meyipzük ta ashir. "Iba ya ketdangsürtem atema dang yok saka komaser yimjaki adok'ar memetet. Iba tebilemtsü atema teinyaksü indang osang dang ni lemsatép" ta pai ashi. Sharma ya July 6, 2021 nü Sukma nung SP inyaksü tenük aser hopta ka dang lir külen iba sangdong agütsü. "Ni tensa asadanga sülen tarütsü nung timtem majurütsü atema iba tetuyuba agütsü. Iba ya tamangba yimsü melenba atema masü. Missionary temi yimtsüngtemi aodang parnok kümzüksü atema onoki tenük yoktsüla, kechiyong item tesemtemji mepetmesü alidak lir. Item tesem nung ozüng alema inyakba mapa ajak noktangtsüla" ta SP Sharma-isa metetdaksü.

ANOGO ABEN TSÜNGREM DEN

Mopung shingaiia pua arutsü makok

"Mopungi koleni onnüdir, ilenji aoner aser nai iba olaji angashir, saka aji kolen nungi arur, aser koleni aor aji memetet. Tanela nungi asoba nisung shia yamaji lir." Yohan 3:8

Nikodima, Farisi nunger tashir tulur ka aser nüburtem ajak tasüngdangdak nükdang nisung ka. Aonung Yisu dangi pa tasüngdangtsü aika bener aoba angur. tena sensaksem nung onük taret, tanaben asotsüba indang jembidang, pa ama tashitemeter nisung süaka pai Yisui jembiba mangatet. Nungtoko Physicist, Stephen Hawkins aser tanga scientist tangatetbaji, kodaser tazüngla nungi alima ka poktettsüba anungi Tsüngremi anüng aser alima yanglubaji kodanga masü ta nokdak. yamaji asenok tensa nunga, nisunger shisatsü agi metongtetba

Tsüngremer mapa angudang, yabo tamakoktsüa ta bilemertema lir. Tsüngrem tanelai mopung amaji kolen nungi, koba yimya nung aontsü aseni memeteti mapa inyaker. Saka aji asenoki memetetyongbo mopungji mali ta masü. Yamaji Tanela Temeshi mapa inyakbajia asenoki tenük agi munguaka, Pai inyakba kulijibo asenoki angur anungji asen mapa ajunga agi Tsüngrem nem bendanga agütsür Tanelai aniba ama anidaktsüji nungdaker.

SARASADEM

Kibuba, iba alima nung onoki mangatetba aika alitsü akok saka Na ozü tesayur tajungtiba asünungji onok nem angatetdakjangma. Amen

Amungnü, Deobar, Advent Christmas

Rev. S. Temjen Lungkumer, Chumukedima

Osang kakettem azüngdang nisung kari item anogotem indang tera mejangjar ama ajiteta aru. Anungji aji jangjatsütsü asoshi iba oset tatsüka ya zülur.

Laishiba nung amungnü ta alibaji Yihuda nunger temeshi anogo koba dang Sabbath Day ta ajar. Aji hopta tatemnü Honibar anogo lir. Yisu shi nung taküm ali tashi Pa aser Pa nütsüngtemi Sabbath ji temeshi amungnü ta züngshi. Saka iba sülen tanabuba anogo, koba dang hopta mezüngnü ta ajar iba anogo nung Yisu shia aru. (Mk. 16:2; Lk.24:1). Anungji Yisu dak amangertemi tekülem anogoji melenadok. Yisu shia aruba anogoji Pa külemba anogo aküm. Iba anogo dang asenoki Deobar ta ajar. Saka Deobar ya tzümar o agi Ao o kümdaktsüba lir. Ao O nungbo aji Amungnü ta ajatsü tim. Anungji Sabbathji Yihuda nunger asoshi Amungnü aser Deobarji Khristanem asoshi Amungnü. Anapronglaji kasa Amungnü lir.

Advent Christmas: Ibai Latin o Aventus nungi English o advent kümdaktsü saka chichiba nungbo aji coming/arrival ta asütsü. Advent jagi mongpu (season) ka tonga aruba, anasa aruya aliba indang ashir. Tatishitsü agi, Tsünüsempongba mongpu (spring), Tsüngluruwa mongpu (summer), Aluruwa mongpu (harvest), khristmas mongpu, yamala.

Advent Christmas yagi Yisu Khrista shi nung alimai arutsü mapang tongdagi, anasa lir ta sangoktsür. Ibai khristan tem atema jilia taküm renemshia, yongyaseta ataa aliba temaitsü ka lir.

Kodang December ita tonga arudir asenoki Khristmas mongpu arudar ta jembir. Aser asenok tebilemba, teyongyaba balaka akümer. Anungji khristmas mongpu December ita mezüngbuba Deobarji Arogo ajak nung lirumedema Advent Christmas -Khristmas jili sentong aka nungbo kanga ajungtsü ta bilemer. Yamaji 2022 nungbo Arogo Calendar nung lirumedema enokdaktsünüa iba oset tila ya jilia zülur.

(N.B. Anüolen alir arogo kar nungbo Nov. tatemlen iba sentong agia alitsü südi, saka aji Khristmas mongpu masü.)



Israel nung Tisha B'Av (Ninth of Av) indang anogomung nung Ultra-Orthodox Jewish nungertem sarasadamba angur. Iba anogo ya Western Wall nung Jerusalem tekülem kitem raksatsüba bilemteta amonger.

OLONG PAITEP # 5880

	1			2		3		4
5						6		
7		8						
						9		
		10						
11								12
				13				
				14				
15								
				16				

TIPLÉN	LANGTSÜNGLEN
1. Balaka - (5)	2. Hai sür inyak - (4)
6. Aika shirangba - (4)	3. Aor tenüng ka - (6)
7. Tar tatsü - (6)	4. Ali telungi talangka lur - (5)
9. Nenü'er jabaso - (4)	5. Tebang kenyongi mazüoker - (4)
10. Sen latettsüba - (7)	8. Ken atema anenzükertem - (5)
11. Tangar kübok alir - (4)	9. Toktepa noktak - (5)
14. Lon nung inokba - (6)	10. Sen - (6)
15. Tzü ayimdak - (4)	11. Benjong agi - (5)
16. Ajok - (5)	12. Telung nung rizünga ayu - (4)
	13. Tebang nung enok - (4)

OLONG PAITEP # 5879 TELANGZÜBA

TIPLÉN :	LANGTSÜNGLEN :
1. Aben, 4. Artsü, 7. Lisem, 8. Liwa,	1. Aruli, 3. Balala, 5. Suwar, 6. Belem,
9. Sarasadem, 12. Aket, 14. Mangu,	9. Sùjak, 10. Aonung, 11. Dokan,
15. Anünü, 16. Ango.	13. Tinu.



KARBO MANGYIMER, KARBO PELATEPER, KARBO TAJANGZÜK ANGUR

Sobangba : Ohoi...Kapu jungasa lidar sudi...??? Koa na tanüpbö akhi memesuk tejak kanga mesangwa ado...??? Kibong nung tebilemstü khuret kar ali asü koda...!!!!???

Alokba : Junga lir-ko...Oda tang alima tensa mopong ya shisadanga amenerba dang ako... Kar mangyimer...Kar pelar...Karbo tajangzük angur...ta asüba ya koda...!!!!???

Sobangba : Waaaammmaaaa...!!! Kapu nai ashibaji nibo kecha mangateter ado...!!!!!!???????

Alokba : Ena...Corona wara agi asür kibongtembo kanga sasasetamang-ayimer...Sungden (coffin) aser naro ayokba dokan kibur-bo tajangzük angur...Osettsüset/chiyungtsü ayokertema jenjang tali tur ayokerji pelar...Ashiko ano iba COVID-19 mapa nung tongti ketdangsur karbo sen lakh aika ajangzuka ali-ja shibai metet...??? Alima nung wara tamajung kar arura Doctor-tem tajangzük angur...Rongrongshishi/mangatetep kar adokra Lawyer-tem tajangzük angur...Lendong-tsüdong teraksa kar atalokra Engineer/Dekadar-tem tajangzük angur...Ajisuaka wara agi atongertem/tasürtem ajangzükdakbo kecha nunga maka.... Anungji pei sasa kümdanga alitsüba danga.

- Lilir : L.Kika Pongener.

AO OSHI ANGAZÜKDAK:

TANÜ ANGAZÜKTSÜBA OJANG



Kika

(n) nashi, ak aser sü tepseta lokti chiyongdaksür,takar mapa (feast of merit)

* Par **kika** daki yimkong jaoker.

Kiküm

(n) kidangi aiten (entrance)

* Kibur dang masüngdang **kiküm** ajanga maitsüla.

NAI-A YA METETTER MA?

INDIA NUNG NÜBURTEMI SAPUA ALIBA TWO WHEELER KAR: 'JUNE 2021'

1. Hero Splendor	2,64,009
2. Hero HF Deluxe	10,724
3. Honda Activa	94,274
4. Bajaj Pulsar	79,150
5. Honda CB Shine	71,869
6. Bajaj Platina	43,313
7. TVS XL100	35,897
8. TVS Jupiter	31,848
9. Suzuki Access	31,399
10. TVS Apache	30,233

Total - 6,92,716

TANÜBO NAI LANGZÜANG

Q. SAMVEDAN 2021 ayongzüksü atema, IIT-Madras-i _____ den teka amtep.

A.Sony India B.Amazon C.PhonePe D.Google pay

(Taruba adok nung onoki langzüksü)

YASHI ADOK TELANGZÜBA : Singapore

SUDOKU # 5920

	2			7	8	1		
8			2		6	4	5	
	6	1		3				2
		8		4	5	9		1
7		5	1		9	3		6
2	1					5	4	7
		4					9	
9		2						
3		6		9	2	7	1	8

TELANGZUBA # 5919

	7	5	8	9	2	1	6	4	3
4	2	1	7	3	6	9	5	8	
3	6	9	4	5	8	7	1	2	
2	8	7	5	6	4	3	9	1	
6	4	5	3	1	9	2	8	7	
9	1	3	8	7	2	4	6	5	
5	9	2	6	8	3	1	7	4	
1	7	4	2	9	5	8	3	6	
8	3	6	1	4	7	5	2	9	

OJANG LUTEP # 5465

OAJASEN :

POTER :

NGJUA :

URNG :

MAALII :

LUTUKA :

LAIM :

KASA :

SÜSASANHIPGTA :

AKINY :

OJANG LUTEP TELANGZÜBA # 5464

TILAKA INYAKA YUR TULU INYAKTET AMA AJAKLEN TEYAKSANGA JEMBITSÜ MENÜNGDAK

TAN HOPTA ATEMA - KOMA SÜLA ?

Q. Akhi tsüraburtemi yim akümdang yatetba ali kimong aser alushi dak alaka, tanü putu tassenba nung kibong kati ajangzük tetba ali rongsentem madakbo, kibur küma senmangtsü asoshi, tetsür - tebur aser jala- jabaso ta mali, kibong nung tsürabur ana mulung südaktsü nunga koma süla ?

Parliament tenzükba anogo nung senden junga magiteti thinen



New Delhi, July 19, 2021: Hombarnü New Delhi nung Parliament tenzükba anogo nung Ato kilonser, Narendra Modi-i osangbenertem den jembiba noksa nung angur. Kasa noksa nungsa Union Minister tem- Pralhad Joshi, Arjun Ram Meghwal, Jitendra Singh aser V Muraleedharan nungera angur.

New Delhi, July 19 (Agencies):

Hombarnü tzungluruwa mongpu senden tenzükba anogo nung opposition-i sorkar anema yimyim ayim aser Ato kilonser, Narendra Modi-i Union Minister tasenpurtem metetpelatsütsü sentong aliba magiteti liasü. Chairman-i opposition züngsemtem dang aiben süngjemtsü mepishi, saka opposition-i maneni yimyim ayima rongrong adokdaksüba ajanga Lok Sabha aser Rajya Sabha naprongla senden Mongolbar anüngdang 11:00 ako tashi thinen.

Parliament jelia Amongnü Centre sorkari party ajak senden ka ayongzuka amen aser opposition party balala nungi lenirtema temeja senden ka mena liasü.

Opposition lenirtemi, Parliament nung coronavirus wara atema süoktsü aser sorkari junga meinyakba agi linük nung tanaben iba tashidak prokba, mapa makai akümba aser rongsenkettsüng jenjang mejungi akümba süoka jembitsü, ta metetdakja liasü.

Hombarnü nikongdang 3:00 ako nung tanaben senden tenzükba mapang nung Opposition züngsemtemi sabangleni oa sorkar anema maneni yimyim ayima liasü, ajisüaka Deputy Rajya Sabha Chairman Harivansh-i senden ketdangsüa agitsü merang.

Opposition lenir, Mallikarjun

Kharge-i Rule 267 (suspension of rules) kübok o lemtepnüa liasü saka Deputy chairman-i memela.

Opposition züngsemtemi yimyim ayima asatepba mapang nung Ports, Shipping & Waterways Union Minister, Sarbananda Sonowal-i Marine Aids to Navigation Bill, 2021 benok aser Subhash Chandra Singh (BJD), Banda Prakash (TRS), Kanakamedala Ravindra Kumar (TDP) aser GK Vasana (TMC -M) nungeri iba Bill pusema liasü.

Opposition party temi maneni asatepba mapang nung deputy chair-i anogo piyong atema senden thinen.

Anepdang senden tenzükba asür MP ana- Raghunath Mohapatra aser Rajeev Satav na nem akhüm agüja liasü aser anüngdang 12:25 ako nung senden tenzükba Chairman M Venkaiah Naidu-i okila jembitenzükdang opposition züngsemtemi sorkar anema yimyim ayim; iba mapang nungji Chairman-i Minister tasenpurtem metetpelatsütsü atema Ato kilonser, Modi nem mapang agüja liasü. Ajisüaka opposition-i yimyim ayima asatepba agi Ato kilonseri minister tasenpurtem metetpelatsüba mapang magitet. Iba sülen Chairman Naidu-i nikongdang 2:00 ako tashi senden thinen.

Nikongdang 2:00 ako nung senden tenzükba sülena maneni asatepba agi Deputy Chairmen

Harivansh-i nikongdang 3:00 ako tashi senden thinen.

Opposition-i yimya mejungi beshiba atema jashia Modi-i, opposition-i timtem agütsüba ajanga tetsürtem indang Bill, Dalit aser scheduled tribe indang bill mebenoktet, ta ashi.

Modi-i, yimtsüngtem aser aluyimertem kibong nungi Union Ministers shimba senden nung metetpelatsüba mapang nung opposition party kar mepelai liasü, ta ashi.

Tetsür, Dalit aser scheduled tribes nungi aika MP shim aser Union minister kümdaktsü, saka opposition züngsem kari parnok tenüng manganü liasü aser akhüm magütsünü, ta pai ashi.

Ano külen Chairman-i opposition party balalai agütsüba notice 17 memela.

Khen nung onük 17 agizüktsüji tim masü, saka tarutsü nung tongtibang onüktem ajak agizüktsü, ta Chairman-i metetdaktsü.

House lenir tasen aser Union Minister, Piyush Goyal-i, India nung mezüng Ato kilonser, Jawaharlal Nehru mapang nungi tenzükba tang tashi House nung minister tasenpurtem metetpelaja arur, ajisüaka tanübo opposition-i tasenpurtem metetpelatsüba mapang nung timtem agütsüogo, ta aitsü.

Goyal-isa, opposition züngsemtemi beshibaji ni sashia aitsür, item yimya ya linük democratic inyakyim atema lendong asütsü, ta ashi.

Congress-i Pegasus spyware onük bushisüngdangtsü akhanger

New Delhi, July 19

The Hindu, India Today, Indian (Agencies): India nung Israel nung Pegasus spyware amshia osangbenertem densemata tongtibang nisungtem phone itangittba tatalokba ya bushisüngdangtsüla, ta Hombarnü Congress Party-i takhangba agütsü.

Congress Party lenir, Rahul Gandhi-i iba onük nung hashtag "Pegasus" amshia Ato kilonser, Narendra Modi aitsüogo.

Rahul-i twitter ajanga, "Pai nü phone nung aliba azüngba ajak onoki meteta lir," ta ashi.

Anogo ana tejaklena Rahul-i twitter ajanga, "Tanü-asüng nenoki kechi züngdar, ta ni shisadanger," ta metetdakja liasü.

Amongnü International media kati, sorkar agencies dang ang ayokba Israel nung spyware ka amshia India nung nisung 300 dak tema phone ajanga itangiter asütsüa akok; mobile phone number 300 dak tema jangjaogo aser item rongnung tang teinyakdak minister ana, osangbener 40 dak tema, tongtibang opposition lenir asem, Supreme Court judge ka, shishilembartem aser India nung activist tem aika indang phone numbers densema lir, ta metetdakja liasü.

Nisung 300 dak tema nungji Congress lenir Rahul Gandhi, election asalentong yanglur mongin, Prashant Kishor aser Union IT Minister Ashwini Vaishnaw nung densema lir.

Forensic tests ajangasa osangbenertem aika meyong phone nung Pegasus malware aliba jangjaogo, ta osang angazüker.

India nung news organisations- Hindustan Times,

Express aser Network18 nung inyaker osangbenertem aika indang phone tap süogo. Item news organisation timbakati Defence, Home Ministry, Election Commission aser Kashmir densema onük balala nung osang bendener.

Centre sorkari Pegasus spyware amshia phone tap asüba nung parnoki shilem agia mali, ta metetdaktsüba sülen Congress lenir aser MP, Shashi Tharoor-i iba onük ya Independent judicial mesüra Parliamentary committee ka nem agüja bushisüngdangdaksütsüla, ta takhangba agütsü.

"Pegasus spyware ya süoki ia agitsü onük ka lir, kechiyong iba ya linük security den sendaktepa lir. India sorkari iba nungji shilem agia mali ta shiogo, anungji iba onük ya bushisüngdangtsüla," ta Shashi Tharoor-i metetdaktsü.

Osangbenertem den jembidang Congress leniri, "Iba ya Independent judicial mesüra joint parliamentary committee kati bushisüngdangtsüla. Asenoki iba ya sendoka meyütsütsüla," ta ashi.

Tharoor-i twitter ajanga, "India sorkari iba nungji shilem agia mali, ta ashir. Pegasus ya sorkar dang ang ayoker süra India nung tongtibang sensotem itangittsü atema koba linüktemi (China/Pakistan?) iba ya amshir? Iba onük bushisüngdangtsü atema sorkari inyaktsü masü no?" ta metetdaktsü.

Hombarnü Parliament nunga Congress aser tanga party kari iba onük benoka liasü.



Patna, July 19, 2021: India nung petrol aser diesel jenjang maneni atuba anema Hombarnü Bihar yimtiba, Patna nung Rashtriya Janta Dal (RJD) züngsemtemi longkak aitba noksa nung angur.

India nung ano nisung 38,164 dak Covid putet

New Delhi, July 19

(Agencies): India nung ano nisung 38,164 dak coronavirus putet aser iba tashidak agi shiranger 499 süogo; tang tashi nungbo linük nung iba tashidak agi shiranger 4,14,108 süogo, ta Hombarnü Union health ministry-i metetdaktsü.

Tang tashi nung linük nung nisung 3,11,44,229 dak coronavirus putetogo aser tang teshirangdakpur

4,21,665 dang kümogo. Amongnü samples 14,63,593 tendanga liasü aser tang tashi nung samples ajak senteper 44,54,22,256 tendangogo, ta ICMR-i metetdaktsü.

Tang tashi nung India nung iba tashidak agi shiranger 3,03,08,456 anepogo aser iba tashidak agi shiranger asüba shilem 1.33 kümogo, ta Health Ministry-isa metetdaktsü.



July 19, 2021 nü New Delhi nung Parliament senden tenzükba anogo nung MP temi aluyimba ozüng tasen asemprong agienang, ta takhangba agütsüba noksa nung angur.



Königssee, Germany nung July 18 aonung yipru tesashi aitba sülen bobsleigh aser luge track ajunga raksar aliba noksa nung angur.

Philippines-i China nunger rong ka mintok

Manila, Chiteni/July 19 (Agencies): Philippines Coast Guard sangdong ka ajanga ashiba agi, parnoki South China Sea nung China nunger indang raradang amshiba rong ka mintokogo. Iba tatalokba ajanga, mangatetep adoker aliba tzüyim nung linük ana tsüngda maneni toktepbä temaitsü sayur.

July 13 sangdongba osang ka Hombarnü metetdaksüba mapang Coast Guard-i ashiba agi, Marie Louise Bank nung senzüa aliba China nunger indang raradang amshiba rong ka parnoki o agi amokmerena

liasü. Iba sülen China nunger rong ya iba tesem nungi anishia ao, ta kasa sangdong ajanga metetdaksü.

"Chinese Navy Warship 189"-i radio osang ka ajanga parnok sülen anidaka aliba Philippine nunger rong ka dang rong ana tsüngda tetsüngda ita ayutsü metetdaksü, ta Coast Guard-i ashi.

Linük ana ya South China Sea nung ita aika mangatetep adoka arudar. Taküm küm tetenzüklen mangatetep adoker aliba tzüyim-i China nunger rong noklang aika senoka aitba sülen iba mangatetep tenzük.

Philippines-i iba tesem nung China nunger rongtem inyaksangshiba ashishia aruogo aser parnok US-i pusema arudar. Kasa mapang nung China-i parnok inyakyim ya akhi amadang aser iba ajanga kecha aibelen masür ta shiogo.

Chinese Foreign Ministry otongdar Zhao Lijian-i Hombarnü Beijing nung osangbenertem den sensaksemba mapang pai iba ken o jangjaa mali ta ashiba den, pa dang asüngdangba tasüngdangba ya tanga ketdangsürtem dang asüngdangtsü metetdaksü.

Sri Lanka nung Covid-19 Delta Variant kanga kara prokshia odar

Colombo, Chiteni/July 19 (Agencies): Kanga dang COVID-19 tashidak kara menatepyonga aoba adokdaksür, iba variant ya Sri coronavirus Delta variant Sri Lanka nung kanga kara prokshia odar aser Colombo nung tashidak potetertem shilem 30 bo iba variant agi health ketdangsürtemi Hombarnü ashiba den sorkar dang senzüsenpong nung tenokdangba agütsür aliba anentsü metetdaksüogo, ta ashi.

Health services, Deputy Director-General Dr Hemantha Herath-i osangbenertem dang, Delta variant koba mezüng India nung poteta liasü, iba variant ya antiolentip nung aliba Galle, aser Matara district aser antüoklentip nung aliba Jaffna aser Kilinochchi district temia prokshiaogo, ta ashi.

Colombo nung tang tashidak potetertem shilem 25 nungi 30 tsüngda dak Delta variant poteter, ta Herath-i ashi. Health ketdangsüri ashiba agi, SARS-CoV-2,

Delta variant koba ajanga COVID-19 tashidak adokdaksür, iba variant ya Sri Lanka nung nisung 35 shi dak potetogo.

Sri Lanka nung tang coronavirus wave tasembubaden raraba mapang lir. SL nung anogoshi nisung 1000 tema dak tashidak poteta arudar aser iba den nisung 50 shi asür. Ketdangsürtemi May ita nungi benoker aliba tenokdangbatem agintsü tenzükogo. Ajisüaka August 1 nü tashi inter-provincial senzüsenpongbo mesütettsü.

Delta variant ya mezüngbuba Colombo nung June 17 nü nisung pongu dak potet. Public health inspector temi sorkar dang senzüsenpong dak sendakba nung tenokdangba agütsür aliba mesalatsütsü metetdaksüogo.

2020 küm March ita nungi tenzüka tang tashi nung Sri Lanka nung nisung 300,000 shi dak COVID-19 tashidak potetogo aser nisung 3,700 shi süogo. Iba tashidak menar alir 256,000 dak tema anepogo.

Afghanistan-i ambassador anienba ya tesasatsüka: Pakistan

Islamabad, Chiteni/July 19 (Agencies): Afghanistan-i, Islamabad nungi parnok indang ambassador aser tanga ketdangsürtem anientsü asoshi telemtetba agiba ya tia maka aser tesasatsüka, ta Pakistan-i ashi.

Pakistan dangi Afghanistan ambassador'er jala pua bener oa rishikangshiba dak ajemdaker iba jenjang agi, koba tanaben asadangshitsü atema Pakistan-i Kabul dang mepeshi asüngdangogo.

Pakistan Foreign Office sangdong ka ajanga ashiba agi, Pakistan dangi Afghanistan indang ambassador Najibullah Alikhil'er arishi küm 26 tain jala pua bener oa rishikangshia amshi ta aitsüba ken o ya tang bushisüngdangdar aser Ato Kilonser Imran Khan-i tetuyuba agütsüba sülen kanga tongtibangsa asadangdar.

Afghanistan sorkari parnok indang Ambassador aser ketdangsürtem Pakistan nungi anientsü telemtetba agiba ya tesasatsüka aser tia maka, ta Foreign Office-i ashi. Office ajangsa, ambassador, par kibong aser Pakistan nung Afghanistan indang Embassy aser Consulates personnel tem tekümzükba kübok toktsütsü atema security tali yokogo, ta metetdaksü.

Pakistan Foreign Secretary-i Deobar aonung Afghan envoy den ajurutepa diplomat tem tekümzükba kübok toktsütsü atema sorkari

jenjang agiba indang metetdaksüba den lenla ajak nung teka amteper inyaksü tenangzükba agütsü. Afghanistan sorkari parnok telemtetba asadangshitsü imlar, ta kasa sangdong ajanga metetdaksü.

Afghanistan ambassador Alikhil'er jala Silsila Alikhil ya Islamabad nung Hokolbarnü mejangja nisung kari pua bener oa rishikangshi, ta aitsüogo. La taxi ka nung mener senzüa aliba mapang pur ao aser ghonda ishika lir chiok. La linük yimtiba nung F-9 Park anasa yirur lia ngutet. Ajisüaka Interior Minister Sheikh Rashid-i TV channel Geo News den sensaksemba mapang ashiba agi, ambassador'er jala ya pur mao aser inyakyim ajak ya Pakistan tenüng menüksütsü atema inyakba lir.

Iba o mejembi tsüngda Rashid-i, nisung pur aoertem aputsü ana nung lir ta metetdaksü. Paisa, police-i, nisung pur oa rishikangshiba dak sendakba nung ken o ka benokogo, ta ashi. Iba ken o ya ajak dang tongtibangba, kechiyong Ato Kilonseri aibelena alirtem aputsü atema tetuyuba agütsüogo, ta minister-i ashi.

Police nem kuli agütsüba koba media nung ayimsünga prokshi, iba video nung envoy'er jalai, la sempet ka alitsü atema taxi ka hire sür ao ta ashi. La meyipa aruba mapang minute pongushi lir

gari anisangi lenmang tezülen gari khen atema anendaksü aser iba mapang nisung ka arua mezüng la dak asaloktsü aser azük tenzük. Ni kanga tsübua liasü anungji ni süjia oadok, ta lai ashi. Alikhil-isa, la shia aruba mapa jana agi sünga aliba tesem ka nung la toktsür liasü. Iba sülen la taxi ka bener park ka anasai ao aser iba nungijaki lai tebu den külemi inyaker ka dangi call asü, shiba la kidangi anir ao, ta ashi.

Pakistan-i Taliba nem tacit support agütsür ta shia aitsüba dak sendakba nung Islamabad

asur Kabul na obang mepui aliba mapang ka nung nisung pur aoba lendong ya atalokogo. Honibarnü Afghanistan-i Pakistan dang iba ken o nung aibelena alirtem takaratiba nung pua tapet temerenshi agütsütsü khangogo.

Afghan foreign ministry-isa, Pakistan nung Afghan nunger diplomat, parnok kibongtem aser Afghan political & consular missions staff tem tekümzükba aser security dak sendakba nung shisabulua bilemba lemsatepogo.

Pakistan aser Afghanistan na mapang shia kati ka

aitsütepa arudar, aser Kabul-i ashiba agi, Islamabad-i rara agi raksatsür aliba linük nung raratsü atema telungpurtem meyrejang aika yoker aser Taliban pur nem tejenokdak agütsür. Kasa mapang nung Pakistan-i, Afghanistan-i anti-Pakistani group Tehreek-e-Taliban Pakistan aser Balochistan Liberation Army nem teyari agütsür ta shia arudar.

US President Joe Biden-i Afghanistan nungi US aser NATO sepaitem anientsü sangdongba sülen linük nung azütokshi tali küma odar.



Jerusalem kübok Knesset nung hopta shia amenba cabinet senden metenzük tsüngda Israel Ato Kilonser Naftali Bennett (tachichi), aser Alternate Prime Minister & Foreign Minister Yair Lapid na ajurutepba noksa nung angur.

DC Lichamo-i vaccine agütsüba tesemtem semdang



Zunheboto, Chiteni/July 19, 2021: Deputy Commissioner, Peter Lichamo-i GB's nem senpet sen agütsüba mapang tangokba noksa ka yangi angur.

Zunheboto, Chiteni/July 19, 2021 (TYO): Zunheboto town kübok vaccination drive sentong tem reprangshima aser maparen asadanghsitsü nükjidong nung, Deobarnü (18.07.2021) Deputy Commissioner, Zunheboto, Peter Lichamo, Dr. K. Akaho Sema, Dy.CMO Dr. Aron, DTO cum DPO (RCH & UIP)

aser Hekato Chishi, District Store Manager nungger iba jila kübok COVID 19 vaccine agütsüba tesem 11 shi semdanga liasü, ta sangdong ka ajanga metetdaksü. Zunheboto town telungtet nung Covid vaccination drive sentong nung shilem tulu agiba atema, DC, Peter Lichamo-i

pelaba temaitsü sayua colony indang GBs nem senpet sen agütsü. Zunheboto District nung temsüa alir nisung 33775 nem Covid-19 vaccine mezüing dose aser temsüa alir nisung 6284 nem Covid-19 vaccine dose tanabuba agütsüogo, ta kasa sangdong nung shia lir.

Peren DTF senden menogo

Peren, Chiteni/July 19, 2021 (TYO): Hombarnü, DC Conference Hall, Peren nung DTF Chairman aser DC Peren, Sentiwapang Aier-i anir, Peren District Task Force on COVID-19 aser vaccination committee den senden ayonga agiogo, ta sangdong ka ajanga metetdaksü.

Iba senden nung, Dy. CMO Peren, Dr. Lanuakum-i, district nung Covid puteta alirtem/shirangertem aser Covid-19 tendangba indang osang metetdaksü, kong tanü tashi district nung Covid-19 tashidak puteter nisung 741 shi kümogo, iba wara agi shiranger nisung 18 lir aser 'positivity rate' shilem 8.1% asütsü, ta pai ashi.

Dr. Kiholi-i district nung vaccine agütsüba osang agütsüba mapang, July 18, 2021 tashi dose 19,843 (dose anaprongla densema) shi agütsüogo aser district nung temsüa alir nisung shilem 26% tashi nem vaccine agütsüogo, ta lai metetdaksü.

DTF & Vaccination Committee züngsemtemi, State

Sorkar ajanga agütsüba Unlock-III tetuyubatem nung tatsü-talang ajak asadangshia jemi. Iba den külemi, district nung Covid-19 tendangba maparen mesüra Vaccination campaign tem kara achaayanga inyaksü aser district nung ambulance service junga achaayang masüba indang onüktem nung züngsemtem olemtepa liasü.

Kasa senden nung, Kuki Inpi Nagaland nungi teshimtet nübutem aruagi aden aser Primary Health Centre Ahthibung nung doctor tem maliba indang tebilemsü tem lemsatep. Iba dak sendakba nung DTF Chairman-i achaayangtsütsü asoshi nangzükogo.

Maneni, iba senden nung Medical Department-i, Covid tendangba, tashidak tsüngsü bushiba aser Vaccination drive mapang, sentong tem takok angutsüsa, Medical Department den amalitepa inyaksü asoshi SDTF aser Village Council tem dang metetdaksütsü atema DTF dang mepishiogo, ta kasa sangdong nung shia lir.

INDIAN NAVY

AN OCEAN OF OPPORTUNITIES

Indian Navy invites online applications from unmarried male candidates (who fulfill eligibility conditions as laid down by the Government of India) for enrolment as sailor for Matric Recruit (MR) entry:-

ENTRY	EDUCATIONAL QUALIFICATION	AGE	PAY STRUCTURE
Matric Recruit (MR)	Qualified in Matriculation Examination from the Boards of School Education recognised by Ministry of Education, Govt. of India	Candidates should be born between 01 Apr 2001 to 30 Sep 2004 (both dates inclusive)	After successful completion of training, candidate will be placed in Level 3 of Defence Pay Matrix (Rs. 21,700/- to 69,100/-) & MSP @ Rs. 5,200/- per month plus DA (as applicable)

ONLINE APPLICATION FOR MR ENTRY WILL BE OPEN UNTIL 23rd JULY 2021

NOTE:-

- (i) Identity proof is mandatory for online registration.
 - (ii) Please read the instructions given in the website carefully before submitting your e-Application form.
- For details visit www.joinindiannavy.gov.in & Employment News dated 17 July 2021.

APPLY ONLINE THROUGH QR CODE

- Step 1:** Download QR code scanner app
- Step 2:** From the app, scan the QR code given here
- Step 3:** Open URL and follow the instructions.



Wokha nung RAT tendanga senzü



Wokha, Chiteni/July 19, 2021: Wokha town kübok tesem balala nung Medical Department den Wokha DTF longjemer Random Antigen Test (RAT) agiba mapang tangokba noksa ka yangi angur.

Wokha, Chiteni/July 19, 2021 (TYO): District Task Force senden nung bangjemtepba ama, nübur tsüngda Covid-19 tashidak prokba nokdangtsü asoshi, Hombarnü (19.07.2021) DTF den Medical Department longjemer Wokha town kübok tesem trok nung Random Antigen Test (RAT) agiogo, ta sangdong ajanga metetdaksü.

Shishilembar, süngolemba ayokertem aser dokan kiburtem Covid-19 atema tendangtsü nükjidong nung Random Antigen Test (RAT) agia liasü. DTF aser Medical Department longjemer ayongba Random Antigen Test (RAT) mapang, sample 450 shi bendenogo aser item sample rongnung sample ka dak Covid tashidak aliba tendangtet.

Wokha town kübok NST colony, Chukitong Taxi stand, Co-operative Bank, PWD junction, daily bazaar aser police point area tem ayimjema Random Antigen Test (RAT) agiogo.

Covid-19 ali mali tendangtsü ajungmesotsü atema, Wokha District Chambers of Commerce & Industries (WDCCI) president, Rempithung Kikon-i anir RAT team nem teyari agüja liasü aser

züngsem aikati atsiayong melii tendangogo.

Tang ama tensa den apet maparen ajiteta inyakba atema Kikon-i DTF dang pelaba metetdaksü aser tarutsü nunga maneni amalitepa inyaksü asoshi pai nangzük.

Hombarnü tenzükba Random Antigen Test ya July 23, 2021 tashi jila tesemtem nung agitsü aser iba sülen district tesem ajungalen tarensen nung agiyonga aotsü sentong lir. Mongolbarnü (20.07.2021) Vankhosung Mission Centre nung Rapid Antigen Test (RAT) agitsü. Iba sülen, July 22 aser 23, 2021 anogo APMC, Wokha Village aser Longsa village nung ayonga agitsü terenemba lir.

Maneni, iba Rapid Antigen Test agiba mapang, Wokha District kübok colony Council Chairman aser Village Council tem dang Medical Department/Testing team den yaritepa inyaksü asoshi District Task Force-i mepishiogo. Iba den bendenloksema, Rapid Antigen Test agidang, nübur ajaki Covid-19 dak sendakba SOPs nung anidaksü mepishir. Rapid Antigen Test maparen anepdang 8:00 ako nungi tenzüktsü, ta kasa sangdong nung shia lir.

davp 10701/13/0008/2122



Tokyo, Chiteni/July 19, 2021: Olympics tenzüksü anogo pezü lia, Hombarnü Asaka Shooting Range nung India shooter team pur mezüing training agiba mapang tangokba noksa ka National Rifle Association of India-i lemsatepba yangi angur.

U.S. gymnastic team nung züingsem ka dak Covid-19 putet

Tokyo, Chiteni/July 19, 2021

(Agencies): Olympic nung shilem agitsüpur athlete rongnung, gymnastic asayar tetsür ka dak Covid-19 positive putet. Iba wara puteter athlete rongnung la tesübuba asütsü, ta Hombarnü ketdangsür sangdong ajanga metetdaksü. La ya America nungi gymnastic asayar tasen ka lir aser Inzai, Chiba Prefecture nung Tokyo Olympic atema training camp nung shilem agitsü lia, la dak iba tashidak aliba tejangja putet.

Iba training camp nung ketdangsür temi la tenüing memetetdaksü, ta Kyodo sangdong ajanga metetdaksü.

Covid-19 tashidak alir gymnast den gymnast tanga ka külemi kazüba ngutetba sülen, hotel takdang balaka nung la

(tanga gymnast) quarantine asütsüsa kümamadok, ta sangdong nung shia lir.

Inzai yimti kübok mozüki ka nung tanaben tendangba sülen, Hombarnü la dak iba tashidak putetba osang jangjatsü. Deobarnü, la dak iba wara mena ama temulung melemi bilemer.

Brehostibarnü, US gymnast team züingsem 10 shi Tokyo tonga aru aser iba mapang nungi Covid-19 atema parnok ajak screening agia arudar. Parnok kima yimdonglen khenyongi dang mesenzüdaksü aser team anenzükba hotel nungi bus ka nung training agiba tesem tashi tonga meinoktsü, ta sangdong nung shia lir.

Tokyo kübok terepranger medeni aser 'Covid-19 state of

emergency' tensa ka nung iba Games ayongzüksü asoshi renemba mapang, iba yimti nung athlete aser support staff ishika dak coronavirus putetogo.

Kasa anogo (Hombarnü), Tokyo kübok Olympic Village nung Czech nungi beach volleyball asayar ka dak Covid-19 putet. Olympic Village nung, athlete rongnung nisung 3 dak iba tashidak putetba osang jangjaogo. Deobarnü, Olympic Village nung South Africa tebur football team nungi asayar ana dak iba tashidak putet.

Iba dak sendakba nung, South Africa tebur football team ajunga practice session thitsütsüsa kümamadok. Tebur football asayamung lapoka South Africa team-i Japan den asayatsü sentong lir.

Olympic nung asayatsü renemdar: Kento Momota



New Delhi, Chiteni/July 19, 2021 (Agencies): Japan nung badminton asayar Kento Momota-i Olympic nung ajemoka Tokyo Games nung mezüing shilem agitsü terenemba lir. Arishi küm 26 tain Momota, shiba gari lendong nung mejungi yirur sülen taneptsü ngur lir, pai iba Games nung asayatsü asoshi osang lemsatep.

2020 küm January ita Kuala Lumpur, Malaysia nung

Momoto gari lendong ajuru. Momota aser par team airport-i aoba mapang iba lendong atalok. Parnok mena aliba bus yagi truck ka dak kanga mejungi atsük aser iba lendong nung bus anisang asü.

February (2020) ita Momota tenük surgery agitsüsa aküm. Iba lendong ajanga, Momota-i mapang talangka badminton asaya nung shilem magi aruogo.

Tokyo Olympics 2020 nung Japan nung badminton star

Momota-i pelashishia shilem agitsü ta shiogo.

World No. 1 Momota-i, "Asaya mapang, timtem kecha melii tenük agi jung junga dang angur. Taneptsü ngutetba ajanga, asaya atema renemshiba mapang, ni aginüba ama temulung agüja asaya yimyatem angazükogo," ta ashi.

Momota, shibai Tokyo Olympics nung gold medal takok angutsü teimla nung asayatsü renemdar, pai "iba alizüing tongtettsü asoshi kü dak aketba sempet tajungtiba amshia asayaner," ta shisem.

Ita trok tashi badminton asayamung ka nungdanga Momota-i masaya. Gari lendong atalokba mapang, Momota tenük yiruba dak alaka, pa temang nung zübu tululu keta yirua liasü. Iba lendong ataloker sülen, Momota-i badminton asayatsü jangra maitba lemsatep.

Tokyo Olympics 2020 ya July 23 nungi tenzüksü sentong lir aser iba asayamung shibangba sentong August 8 nü agitsü.

Sanju Samson mezüingbuba ODI nung masayatet

Colombo, Chiteni/July 19 (Agencies): India nung Wicketkeeper-batsman Sanju Samson training agiba mapang temekok ligament yiruba sülen Deobarnü Sri Lanka nung mezüingbuba ODI asaya nung masayatetsüsa aküm, ta ketdangsür sangdong ka ajanga metetdaksü.

Samson yirur temang anepalua aliba mapang pa melena Ishan Kishan asayatsü, shiba tang mezüingbuba India team nungi ODI asayatsü.

"Sanju Samson temekok nung ligament yiruba ajanga iba asaya atema shimtsüpur rongnung medensem. Medical team-i pa tema dang asadangdar," ta BCCI media team sangdong ka ajanga metetdaksü.

Virat Kohli-i aniba India team tang England nung oa asayatsü atema renemshiba mapang Shikhar Dhawan-i anir team tanga ka Deobarnü nungi Sri Lanka nung asaya tenzükogo. Iba team ya Rahul Dravid lenisüba nung asayadar.

Sri Lanka tour atema India white-ball captain Shikhar Dhawan-i Honibarnü, Ravi Shastri aser Rahul Dravid na sempet balala aser asayar

ajungshiba yimya balala, ta ashi.

Deobarnü nungi tenzükogo. Parnok T20I asem aser ODI asem asayatsü. India team ya Dhawan lenisüba nung asayatsü aser Bhuvneshwar Kumar assistant captain asütsü.

"Iba asayamung ya kanga tongtibang; India tenüing nungi asayaba asyamung ajakji tongtibang. Ita ishika lir World Cup asayatsü liaka, meliaka aji tongtibang masü. Asayar ajaki tajungtiba asayaner. Opening slot atema tetoktepba lir. Iba asayamung nung ni aniba team nem junga asayadaksüner. Onoki junga asayara tanga lenmanga sadema lapoktsü," ta pai ashi.

Rahul Dravid aser Ravi Shastri na coach asüba yimya indang asüingdangba mapang pai, "tenaprongla sempet balala. Ni Ravi den mapang aika intokogo. Ravi aser Rahul na nisung ajungshiba yimya balala. Ni tenaprongla lenisüba kübok asayaner," ta ashi.

India aser Sri Lanka na tsüingda ODI asem ya July 18, 20, aser 23 nü asayatsü aser T20Is asem July 25, 27 aser 29 nü asayatsü.

Shikhar Dhawan-i otsü tasen ka yangluogo



Colombo, Chiteni/July 19, 2021 (Agencies): Tang, Sri Lanka Tour atema India team captain inyaksang Shikhar Dhawan-i opener batsman ka ama international cricket nung run 10,000 tongtetogo. Deobarnü, R Premadasa Stadium nung India aser Sri Lanka na tsüingda mezüing ODI asayaba mapang, Dhawan-i iba jenjang ajangzüktet.

Kasa mapang, 50-over format nung run 6000 tongteta asayar India batsman rongnung Dhawan asayar 10buba kümogo.

Dhawan (86*) aser Ishan Kishan (59) nati junga asayaba ajanga, India team-i wicket 7 agi Sri Lanka madak takok angu. Team ana tsüingda ODI asem nung tanabuba match ya Mongolbarnü asayatsü.

Iba Tour ayonger team-i toss akokba sülen batting asütsü

shim aser Chamika Karunaratne-i run 43 bendenlokja Sri Lanka-i over 50 nung run 262 yanglutet; aser wicket 9 tashi out süadok. India atema bowling tsütsü Kuldeep Yadav, Yuzvendra Chahal aser Deepak Chahar nungeri kanga nungita parnok ajaki wicket anana agi.

International cricket asayamung tsütsü, opener batsman ama Virender Sehwag, Sachin Tendulkar, Sunil Gavaskar aser Rohit Sharma nungeri run 10,000 dak tema yangluogo.

Ano külen, iba ODI format nung, run 6000 dak tema yanglur alir tanüingba batsman tuku rongnung Tendulkar, Virat Kohli, Sourav Ganguly, Rahul Dravid, MS Dhoni, Mohammed Azharuddin, Rohit Sharma, Yuvraj Singh aser Sehwag nung dena lir.

BILEMDANGANG

"Telok den melii kisüing küma alir temulung alemdak maka."